

DIBANDU

Nsambi amasunda julu na tsi na biotsu abivu muna

1 ¹Ava Nsambi amasundila julu na tsi,
²tsi jimaba tindi vumbila; pisama ji-magumba mubu agumabanganga yiari na yiari tumba Yinyunyi ayiruyili ombu Nsambi amafundulanga mamba. ³Nsambi amavosa rie: Yijalala yibi! Na yijalala yimamba. ⁴Nsambi amalaba yiri yijalala yivu yiboti na amakakasana yijalala na pisama. ⁵Nsambi amaluga yijalala nyangu na amaluga pisama mukolu. Vamaba tsisiga mbana vamaba kedi: la yilumbu yitega.

⁶Nsambi amavosa rie: Vabi yima yigala ayiugaga mamba, ayiukakasana mamba na mamba. ⁷Nsambi amayivaga ukakasana mamba amavu o tsi yionyi na mamba amavu o julu yionyi. Anana dionyi dimabila. ⁸Nsambi amayiluga julu. Vamaba tsisiga mbana vamaba kedi: la yilumbu yimubeji. ⁹Nsambi amavosa rie: Mamba amavu o tsi julu magukimi va mosi na ukamuga ulabini. Anana dionyi dimabila. ¹⁰Nsambi amaluga ukamuga ueni butamba, amaluga diguki die-ni dimamba mubu. Nsambi amalaba yiri adina dimaba diboti. ¹¹Mbana Nsambi amavosa rie: Butamba bumbendisi bivaru abiburi biguji biminongu na minongu na miri amiburi milunda miminongu na minongu. Anana dionyi dimabila. ¹²Butamba bumabendisa bivaru abimabura biguji biminongu na minongu na miri animabura milunda miminongu na minongu. Nsambi amalaba dionyi dimaba diboti. ¹³Vamaba tsisiga mbana vamaba kedi: la yilumbu yimurieru. ¹⁴Nsambi amavosa rie: Bijalala bibangingi o julu ukakasana nyangu na mukolu, dionyi diuba bilimba abiutabula temu tsibafeta nesi bilumbu nesi bilima; ¹⁵na bionyi biuba bijalala bijulu abiumonitsa tsi. Anana dionyi dimabila. ¹⁶Nsambi amavaga bijalala bibeji bineni: yijalala ayiviolila uroga la wisi uruma nyangu na yijalala ayigeyi la tsungi uruma mukolu na amavaga bambuelili wandi. ¹⁷Nsambi amabinamiga o julu umonitsa tsi, ¹⁸uruma nyangu na mukolu, na ukakasana yijalala na pisama. Amalaba dionyi dimaba diboti. ¹⁹Vamaba tsisiga mbana vamaba kedi: la yilumbu yimuina.

²⁰Nsambi amavosa rie: Mamba mafunisangi nyama tsimamba tsiminongu na minongu na batsoli babasi julu jiotsu. ²¹Nsambi amasunda tindi mikuumbi mimbu, na nyama tsimamba tsiminongu na

minongu Amalaba dionyi dimaba diboti.

²²Nsambi amagabilna nyama tsimamba na batsoli miula novosa rie: Biotsu abivu mu mamba bifuni ne te na miubu miubasa; na batsoli bafuni vava tsi. ²³Vamaba tsisiga mbana vamaba kedi: la yilumbu yimurianu.

²⁴Nsambi amavosa rie: Bibulu biminongu na minongu biburisini vana tsi: nesi biruitsi nesi bilandila nesi bibulu bimusiru biminongu na minongu. Anana dionyi dimabila. ²⁵Nsambi amavaga bibulu biminongu na minongu: nesi biruitsi nesi bibulu bimusiru nesi bilandila biminongu na minongu. Amalaba dionyi dimaba diboti. ²⁶Mbana Nsambi amavosa rie: Tuvayianu dibaala mu yikebutsu yietu nesi yibagunu yietu na ake-lisingi nyama tsimamba, nesi batsoli nesi bibulu nesi bilandila bitsi jiotsu.

²⁷Nsambi amasunda mutu mu yikebutsu yiandi,

amasunda mu yikebutsu yiNsambi, amasunda dibaala na mugetu.

²⁸Nsambi amabagabila miula na amabatsingula rie: Funanu na burasananu, basanu butamba na barumianu, banu bafumu banyama tsimamba nesi batsoli nesi bibulu biminongu na minongu. ²⁹Nsambi amamusova rie: Nyiduveyi bivaru biotsu abiburi biguji biminongu na minongu; abina biuba biguji bienu. ³⁰Ombu bibulu biotsu bimusiru na batsoli botsu na biotsu abilingi va butamba, diwendi rie: biotsu abivu monyu nyubivega biriri abiuba biguji biogu. Adina amavaga. ³¹Nsambi amagengila motsu ama amavaga. Amalaba mamaba tindi maboti. Vamaba tsisiga mbana vamaba kedi: la yilumbu yimusiamunu.

2 ¹Anana julu na butamba na biotsu abivu muna bimasundulu. ²Yiotsu yiyilumbu yimusambuali Nsambi amamana bisalu biandi biotsu; mu yilumbu yimusambuali amavuma, amamana bisalu biandi biotsu. ³Kabogu Nsambi amagusula yilumbu yimusambuali na amayivaga yilumbu yiuwuma diwendi rie: yilumbu yiandi mu mbari muna yilumbu yieni bisalu biandi biotsu bimusunditsi bimasuka. ⁴Anana julu na butambu bimasundulu.

Nungi Eden

Ava Fumu Nsambi amavayila tsi na julu ⁵vasamaleba ne muiri umosi va tsi na vasamaleba ne yivaru yimosi. Fumu Nsambi mbe

asakanoyisa mfula na mbe asakasunda mutu usalanga butamba.⁶ Vamaba dimungi adimamatanga uyenatsatsanga butamba buotsu.

⁷Fumu Nsambi amabonga butamba na amabumba mutu, amavotsa punga jimonyu mu miunu mimbasu andi na monyu umakota mutu.⁸ Mbana Fumu Nsambi amavara nungi o musiru uEden o yiari ayi wisi epalili na amasunsa mutu agu amasunda guna.⁹ Fumu Nsambi amabendisa miri miminongu na minongu: amiboti ugengila na amiburi milunda miboti uji, no gari nungi umaba muiri aguiburi milunda amiveyi monyu, na muiri aguiburi milunda amijabisi motsu.

¹⁰Mujamba umapalila o Eden utsatsila nungi, avana umakegabila mijamba mina.¹¹ Diina dimujamba utega divu Pischon; aguna aguitsiengili bulongu buHavila, o yiari yieni bedilili lora.¹²Lora jiyari yieni jivu tindi lora. Aguna bedilili maka amavu na mbunga jiboti amenengulungu bdellium na dimanyi adivu na dufunu duneni adinengulungu onikisa.¹³ Diina dimujamba agumubeji Guihon; aguna aguitsiengili bulongu buotsu buCusch.¹⁴ Diina dimujamba agumurieru divu Tigre; aguna aguivindimi o yiari ayi wisi epalili yimusengi uAssor. Diina dimujamba agumuina divu Euphrate.

¹⁵Fumu Nsambi amabonga mutu na amamusunsa o nungi Eden ujisalanga nojikipanga.¹⁶ Fumu Nsambi amamaruma rie: Janganga milunda mimiri miotsu minungi;¹⁷ tumba guyaji milunda mimuri aguujabisi motsu mu mbari yilumbu ayi gumiji gufu.

¹⁸Fumu Nsambi amatasa rie: Disawelima na yiri mutu abi pinsa; nyumuvayila muwamusu agubagunu nandi.¹⁹ Fumu Nsambi amabonga butamba na amabumba bibulu biotsu na batsoli bortsu na amabiwendisa ombu mutu ubiluga miina, diina yika la diina adi mutu amabiluga adina binengulungu.²⁰ Mutu amaluga biruitsi biotsu miina na batsoli na bibulu biotsu bimusiru; tumba asamaba na muwamusu agumabagunu nandi.²¹ Mbana Fumu Nsambi amamuwendisa yilu yineni na amabonga dubansi duandi dumosu na amagulasana mbura aji amadubongila.²² Fumu Nsambi amakaluu dubansi adu amabongila mu dunyuru dumetu mugetu na amamuwendisa ombu gandi.²³ Mbana mutu amavosa rie:

Agugu ebagunu nami
avu yivisi yiами na musonyi ami!
Onengulungu mugetu,
mu mbari amabongulu mu dunyuru
dudibaala.

²⁴La dibandu dibaala osilila taji andi na ngugi andinofubana na mugatsi andi, jogu babeji boba umosi.

²⁵Dibaala na mugatsi andi botsu babeji bamaba penyi tumba basamalabanga yisonyi.

Dibaala na mugetu bamabingu o nungi Eden

3 ¹Nyoga amajaba usoga diela ne uviolila bibulu biotsu bimusiru abi Fumu Nsambi amavaga. Amawivula mugetu rie: Dingensa Nsambi amavosa rie: Duyaji milunda mimiri miotsu minungi.

²Mugetu amawagulu nyoga rie: Tuna musuga uji milunda mimiri minungi.

³Tumba milunda mimuiri aguvu o gari nungi, Nsambi amagandisa rie: Duyamiji na duyamibemba mu mbari dukefu.

⁴Mbana nyoga amatsingula mugetu rie: Ufur efuri dugofu.⁵ Tumba Nsambi ejabi: Yika duimiji dujaba mambu nana mavu, duba nderi nsambi oyijabi maboti na mabi.

⁶Mugetu amalaba yiri milunda mimuiri mimaba miboti ugengila noji na amagulu nsala umidokula nodila dujabu kabogu amabonga mulunda umuiri eni na amaji na amaguvega ombu mulumi andi wandi, na jandi amaji.⁷ Yiotu yina botsu babeji bamajaba yiri bavu penyi na bamaneka magaji maneni uvaga misobi.

⁸Dibaala na mugetu banogulu mikindi miFumu Nsambi ava amalingila o nungi tsisiga, bamasuema Fumu Nsambi va gari miri minungi.⁹ Tumba Fumu Nsambi amanengila dibaala na amamuwivula rie: Agu' guvu?

¹⁰Amawagula rie: Nyimagugulu o nungi. Nyimalaba goma mu mbari nyivu penyi kabogu nyimasuema.¹¹ Fumu Nsambi amawivula rie: Anyi amagulonsa yiri guvu penyi? Je gumaji mulunda agu nyimagugandisa?

¹²Dibaala amawagula rie: Mugetu agu nde' gumapega uba muwamusu ami amakwakisa mulunda umuiri eni na nyimaguji.

¹³Fumu Nsambi amawivula mugetu rie: Dibandu yi gumavayila nana? Mugetu amawagula rie: Nyoga amansoga diela na nyimaguji.

¹⁴Mbana Fumu Nsambi amatsingula nyoga rie: Gunovaga nana kabogu nyuguloga; yika nde' va gari biruitsi biotsu na bibulu biotsu bimusiru guwendanga na tulu agu na yika nde' gujanganga difufundu te na yitsingu yiagu yiotsu.¹⁵ Nyuvaga yikenganyi

va gari jenu na mugetu na va gari bategula
bagu na bategula bandi: jogu bodudimbanga
va miuru na jenu dubagakanga va bisonginyi.

¹⁶ Amatsingula mugetu rie: Nyufunisa
misongu ava guburilanga. Diuleba gubura-
nga na maguga ne nana guba na nsala mulu-
mi agu na gurumungu nandi.

¹⁷ Amatsingula Adam rie: Gunogululu
diifi dimugatsi agu noji mulunda umuiri agu
nyimagugandisa na diruma diedidi rie:
guyaguji!

Kabogu mu diambu diagu

Nyuloga butamba

Gutsoganga udila biguji biagu
te na mutubu.

¹⁸ Butamba bugubendisila
matsiendi na kengitsi.

Gujanganga abi gumavara.

¹⁹ Gusala tindi usalanga

udila biguji biagu
te na vana gugabuga

o butamba abu gumabongulu
mu mbari gumaruyila mu butamba
gumuegabuga muna butamba.

²⁰ Adam amaluga mugatsi andi Eve: mu
mbari amaba nguji jibatu botsu. ²¹ Fumu
Nsambi amavayila Adam na mugatsi andi
biduaru bimikata na amabaduisa bionyi.

²² Fumu Nsambi amavosa rie: Laba mutu
amakaluga nderi nsambi ujabanga motsu.
Tsie tumugubitsianu yiri agodokula milunda
mimuiri umonyu nomiji nobanganga monyu
umutubu. ²³ La dibandu amamubingila o nu-
ngi Eden uyesala butamba abu amabongulu.

²⁴ Anana amabingila Adam; amasunsa bia-
nsa bimangolu o yiari ayi wisi epalili yinungi
Eden na dijenga dimuji ukelisa nsila jimuiri
umonyu.

ISBN 9966 40 305 1
YIPUNU BIBLE CL062P UBS-EPF 4M 1994

Gabon
yipunu
Bible
1994
Moukagny/Nelson
BSCAM
Yaounde
Cameroon
B209167